

Na osnovu člana 16. stav 4. Zakona o Vladi Zeničko-dobojski kantona - Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva unutrašnjih poslova, Vlada Zeničko-dobojskog kantona, na 109. sjednici, održanoj dana 16.06.2021.godine, d o n o s i

ZAKLJUČAK

I.

Utvrđuje se prijedlog Zakona o izmjenama i dopuni Zakona o unutrašnjim poslovima Zeničko-dobojskog kantona.

II.

Prijedlog Zakona iz tačke I. ovog zaključka upućuje se u dalju skupštinsku proceduru, po skraćenom postupku.

III.

Zaključak stupa na snagu danom donošenja.

PREMIJER

Mirnes Bašić

Broj: 02-_____/21

Datum, 16.06.2021. godine

Zenica

DOSTAVLJENO:

1x Ministarstvo unutrašnjih poslova,

1x Stručna služba Skupštine,

1x a/a.

PRIJEDLOG

Na osnovu člana 37. stav 1. tačka f) Ustava Zeničko-dobojskog kantona Skupština Zeničko-dobojskog kantona, na __ sjednici održanoj dana __2021. godine, d o n o s i:

ZAKON O IZMJENAMA I DOPUNI ZAKONA O UNUTRAŠNjim POSLOVIMA ZENIČKO-DOBOJSKOG KANTONA

Član 1. (Izmjena člana 33.)

U Zakonu o unutrašnjim poslovima Zeničko-dobojskog kantona ("Službene novine Zeničko-dobojskog kantona", broj: 13/18, 6/19, 22/19 i 21/20) u članu 33., tačka d) mijenja se i glasi: "d) da ima čin glavnog ili samostalnog inspektora i najmanje deset godina radnog iskustva na rukovodećim poslovima policijskog službenika, s tim da se pod rukovodećim radnim iskustvom smatra iskustvo ostvareno u činu višeg inspektora ili iskustvo u višem činu."

Član 2. (Izmjena člana 39.)

U članu 39., stav (4) riječi "glavnog inspektora" zamjenjuju se riječima "koji je imao prije imenovanja".

Član 3. (Dopuna člana 42.)

U članu 42., stav (1) iza tačke f) dodaje se tačka g) koja glasi: "g) u slučaju ispunjavanja uslova za penzionisanje predviđenih zakonom;"

Član 4. (Stupanje na snagu i objavljivanje)

Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona".

Broj:
Datum:
Z e n i c a

PREDSJEDAVAJUĆI

Ćazim Huskić

O B R A Z L O Ž E N J E

PRAVNI OSNOV

Pravni osnov za donošenje Zakona o izmjenama i dopuni Zakona o unutrašnjim poslovima Zeničko-dobojskog kantona sadržan je u članu 37. stav 1. tačka f) Ustava Zeničko-dobojskog kantona u kojem je propisano da Skupština Zeničko-dobojskog kantona donosi zakone i druge propise iz nadležnosti kantonalnih organa.

RAZLOZI ZA DONOŠENJE

Razlozi za donošenje Zakona o izmjenama i dopuni Zakona o unutrašnjim poslovima Zeničko-dobojskog kantona (u daljem tekstu: Prijedlog Zakona) sadržani su u sljedećim činjenicama:

Zakonom o unutrašnjim poslovima Zeničko-dobojskog kantona ("Službene novine Zeničko-dobojskog kantona", broj: 13/18, 6/19, 22/19 i 21/20) (u daljem tekstu: Zakon o unutrašnjim poslovima) ograničava se konkurencija kandidata za imenovanje na mandat policijskog komesara. Između ostalih uslova, kandidat za policijskog komesara po važećem zakonu mora da ima tri godine u činu glavnog inspektora. Sadašnja struktura policijskih službenika sa ovim uslovima je ograničena i onemogućava većem broju policijskih službenika da se kandiduju, a imaju višegodišnje iskustvo u policijskoj službi na rukovodećim poslovima. Ti policijski službenici iz raznih razloga, na koje nisu mogli uticati nisu uspjeli dobiti čin glavnog inspektora iako su ispunjavali uslove. Ovom izmjenom zakona omogućila bi se veća konkurencija u postupku imenovanja policijskog komesara i stvorili bi se zakonski uslovi većem broju policijskih službenika da se kandiduju.

Dodavanjem tačke g) u stavu (1) člana 42. Zakona o unutrašnjim poslovima isti se usklađuje sa odredbama Zakona o penzijsko invalidskom osiguranju Federacije Bosne i Hercegovine ("Službene novine Federacije BiH", broj: 13/18) i Zakonom o policijskim službenicima Zeničko-dobojskog kantona ("Službene novine Zeničko-dobojskog kantona br: 4/14 i 2/18) kojim su propisani uslovi za penzionisanje.

Uzimajući u obzir naprijed navedeno predlažemo da se Zakon o izmjenama Zakona o unutrašnjim poslovima donese u predloženom tekstu i da se razmatra po skraćenom postupku.

OBRAZLOŽENJE POJEDINIH PRAVNIH RJEŠENJA

Član 1. Prijedloga Zakona

U članu 33. vrši se izmjena uslova koje kandidati za policijskog komesara moraju ispuniti tako da se kandidatura omogućava i policijskim službenicima koji imaju čin glavnog ili samostalnog inspektora sa najmanje deset godina radnog iskustva na rukovodećim poslovima policijskog službenika, s tim da se pod rukovodećim radnim iskustvom smatra iskustvo ostvareno u činu višeg inspektora ili iskustvo u višem činu.

Član 2. Prijedloga Zakona

U članu 39. omogućava se policijskim službenicima da se nakon isteka mandata policijskog komesara vrate u čin koji su imali prije imenovanja.

Član 3. Prijedloga Zakona

U članu 42. omogućava se Nezavisnom odboru da podnese prijedlog za razrješenje policijskog komesara i u slučaju nastupanja uslova za penzionisanje shodno Zakonu o penzijsko invalidskom osiguranju Federacije BiH, ukoliko nadležni organ to sam ne učini po službenoj dužnosti.

Član 4. Prijedloga Zakona

Propisano je stupanje na snagu osmog dana od dana objavljivanja u "Službenim novinama Zeničko-dobojskog kantona".

POTREBNA FINANSIJSKA SREDSTVA

Provođenje predloženog Zakona o izmjenama i dopuni Zakona o unutrašnjim poslovima Zeničko-dobojskog kantona neće rezultirati fiskalnim posljedicama na Budžet Zeničko-dobojskog kantona za 2021. godinu, u smislu potrebe obezbjeđivanja dodatnih budžetskih sredstava.